

Visoki predstavnik dodatno ojačao Sud BiH

Visoki predstavnik, Paddy Ashdown, ove sedmice je imenovao Myron Greenberg, sudiju američke savezne države Minnesote, te Bernarda Pierra, sudiju iz Bordeauxa, Francuska, kao međunarodne sudije u Posebnom vijeću za organizirani kriminal i Posebnom vijeću za privredni kriminal i korupciju, u okviru Krivičnog odjela Suda Bosne i Hercegovine.

U Zakonu o Sudu BiH navodi se da će u prijelaznom periodu dok se Sud bude uspostavljaao u Posebnom vijeću biti šest međunarodnih sudija. Uz dva ovosedmična imenovanja, do sada je imenovano pet međunarodnih sudija. Visoki predstavnik očekuje da će šesti sudija biti imenovan do početka oktobra ove godine.

“Financijski kriminal, korupcija i organizirani kriminal i dalje predstavljaju stvarnu prijetnju za ekonomski i socijalni položaj svih bosanskohercegovačkih građana, i istinsku prepreku za rast domaćih i međunarodnih ulaganja u BiH. Sud BiH nalazi se u središtu strategije za borbu protiv takvog kriminala u BiH, a zatvaranje krupnih kriminalaca već je počelo. U posljednjih 18 mjeseci BiH je radila na uspostavljanju mehanizama za borbu protiv organiziranog kriminala i korupcije. Sada smo te mehanizme počeli koristiti. Hrabro i neovisno pravosuđe je glavno oružje u borbi protiv kriminala. Upravo njega izgrađujemo u Bosni i Hercegovini, kroz reforme pravosudnih struktura, i uz pomoć međunarodnih sudija” rekao je visoki predstavnik prilikom imenovanja sudija Greenberg i Pierre.

Sud BiH, čiji je Krivični odjel počeo sa radom tek u januaru, do sada je donio odluke u slučajevima krivotvorenja, krijumčarenja i trgovine narkoticima, pri čemu je 12 optuženika ukupno osuđeno na više od 22 godine zatvora.

Tužilaštvo BiH pred ovim Sudom je podiglo još 20 optužnica, a procesuiraju se još 68 slučajeva sa preko 200 optuženika.

Sud BiH ima tri sudska odjela: za krivično pravo, upravno pravo i žalbe. Rad Posebnih vijeća usmjeren je na organizirani kriminal, privredni kriminal i korupciju.